

Steelpan Academy cu invitacion pa henter comunidad

Pa apertura oficial

AWOR cu e apertura ta cerca y comunidad di Aruba a tuma nota di e bunita proyecto di "The Edgar Connor National Youth Steelpan Academy", reaccionnan den comunidad a cuminsa los. Un di e reaccionnan sumamente positivo ta cu un gran cantidad di adulto a aserca The Caribbean University of Aruba, pa mira si tin e posibilidad cu lo tin les tambe pa esnan di 25 aña p'ariba. Un poco sorpresa pa e reaccion sumamente positivo aki, CUA a delibera y definitivamente ta mira espacio pa incorpora un grupo di adulto den e precioso proyecto. Ta asina cu lo crea espacio den oranan di anochi pa duna les tambe na esnan di edad mas avansa. Consecuentemente, hunto cu e inscripcionnan di hobennan, tambe esnan adulto a cuminsa inscribi. Un otro reaccion positivo ta cu varios persona cu posicion

importante den nos comunidad a pidi CUA pa ta un factor importante den un tipo di networking cu tur esnan interesa, pa a base di un teamwork profesional bini cu produccion artistico riba tereno di Steelpan na San Nicolas. Esaki cu e meta primordial pa promove e bida cultural-artistico na San Nicolas y becindario y cu e posibel efecto cu e turista cu ta bishita Aruba ta haya un bon idea di kico ta un di Aruba su tesoronan

cultural di e parti di e isla ey. Ideanan sumamente alentador cu The Caribbean University of Aruba kier duna un aporte tambe, semper y cuando cu e concepto di Academia di Steelpan pa hubentud haya su chens pa desaroya den direccion positivo. Mas informacion por ser haya riba nos website di www.caribbeanuniversity.net na unda tambe por inscribi online pa e Steelpan Academy. Tambe por

yama 743-1596 of via email na info@caribbeanuniversity.net of caribun_aruba@yahoo.com.

Actualmente preparacion pa e apertura oficial di dia 18 di januari ta den pleno desaroyo y e 'Nochi Cultural Caribense' cu ta e estilo di apertura ta priminti di bira algo hopi "cozy" y "groovy". Paharitonan ya ta canta cu e agrupacion "Le Groove" pa e apertura oficial di e "Steelpan Academy" ta

trahando riba algun cancion netamente pa e apertura y nan ta priminti di bin "por la goma". Bini uno bini tur pa e apertura oficial dialuna, 18 di januari na 'The Heart of San Nicolas' (antes St. Theresita Centre) cuminsando for di 7:30 pm. E hubentud interesa di Aruba por sigi inscribi nan mes, pa asina "The Edgar Connor National Youth Steelpan Academy" habri su portanan dia 1 di maart 2010, cu tur orguyo.